

DIA OL PREN BILONG WOK MISIN!

Mipela i amamas long salim dispela niusleta No. 62 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 30 Julai, 2017. Ofa long dispela Sande i go long sapotim wok misin. Tenkyu tru long prea bilong yupela ol bratasusa i harim ol dispela ripot.

Adres bilong salim mani:

EBC Overseas Mission
BSP Goroka Branch
No. 1000 751 861

OI Fild Adres:

Mike Kaire

EBC Community Service
P.O. Box 250, Dili, East Timor
Mobile: (00) 670 77757402
Email: mikekaire@ymail.com

Sifu Family

STT BMW Papua
Nabire 98802
HP: 0852-1357-0016/
0812-48620-831
Phone: (+628) 124 8620831
Email: bmwpapua@gmail.com

Liklik nius long EBC Wok Misin

Design & Printing by:
EBC Publications Department, Lae

Dia ol bratasusa,

Mipela i save lukim strong bilong Bikpela long olgeta wok God i singautim yumi long bringim gutnius insait long PNG na long ol arapela kantri. Wan wan wok God i kirapim yu long mekim long autim gutnius, prea na givim i no save i go lus nating. God yet em i Papa bilong dispela wok na em bai blesim yu wan wan.

"Tasol bihain Holi Spirit bai i kam i stap long yupela, na yupela bai i kisim strong. Na yupela bai i autim tok bilong mi long Jerusalem, na long olgeta hap bilong Judia, na long distrik Samaria, na i go inap long olgeta hap bilong graun." Aposel 1.8

Olgeta disaipel bilong Jisas ol i kam long ples Galili, asples tru bilong ol i stap long distrik Galili, em asples tru bilong ol.

Olsem na Jisas i tokim ol, yupela i kisim pawa, orait yupela i mas i statim wok long Jerusalem (i no asples tru bilong ol). Na bihain wok i go olsem long Judia, distrik Samaria na i go long olgeta hap graun. Tasol long yumi planti, yumi save ting olsem Jerusalem em i asples bilong ol disaipel. Nogat.

Long dispela as, yumi save tok, yumi laik tingim Jerusalem bilong yumi pastaim. God i ken helpim yumi long lukluk long tok bilong en na skelim gut. Wanem hap yu stap long en, maski em i no asples bilong yu (Jerusalem), kirapim kingdom bilong God long dispela hap. Prea, givim na autim gutnius long olgeta hap, i no long asples bilong yu tasol.

SAMPELA NIUS LONG WES PAPUA FAMILI SIFU

Brata Sifu i tok, "Wok bilong mipela long hia, mipela i lukautim fam bilong skul. Mipela i planim orens na lukautim pik bilong skul long sapotim skul.

Mipela tu i holim wok kaunseling namel long ol sumatin na stretim wari bilong ol. Ol Wes Papua i no save amamas long ol Indonesia i harim wari bilong ol, olsem na Bikpela i stiaim dispela rot long mitupela susa i mekim dispela wok.

Mipela tu i holim klas bilong lainim tok Inglis we olgeta sumatin i save amamas long kam na lainin. Mipela i holim wanpela aua long Inglis klas long olgeta Fonde na sampela taim tupela aua sapos tisa bilong narapela lesan i no kam.

Mitupela susa i laik holim wanpela English Bible Class (EBC) long tupela sios we mipela famili i save helpim. Long dispela rot mitupela bai autim nem bilong Bikpela long ol.

Mipela i amamas long givim sapot long lokal sios long hia we mitupela i save autim tok bilong God long Sande na Trinde. Susa Baba i save helpim long famili lotu long Trinde na tu em i fultaim Sandeskul tisa long dispela sios.

Wanpela hevi na wari bilong mipela we yupela i ken helpim na tingim mipela long prea em long aplai long nupela visa. Narapela hevi tu em sait bilong komunikesen. Taim ol Wes Papua lain i save protest long kisim independens, ol Indonesia i save kontrolim olgeta komyunikesen sistem long intenent na fon wantaim, dispela i givim hat taim long mipela. Tenkyu tru long harim bilong yupela na God i ken blesim yupela."

IS TIMOR

Wok wantaim Is Timor Protestan Sios

Mipela i bin trenim ol pasto na evanselis, tude God i helpim ol dispela wok manmeri na ol i autim tok tru. Tenkyu long Bikpela, ol yet i kisim helpim long tok pastaim na bihain ol i autim.

Mipela i go on long givim kaikai long ol tarangu pikinini. Care Channels International (CCI) yet i save givim kaikai long ol. Em wanpela rot long soim laikim bilong God long ol dispela lain na autim tok bilong God tu long ol.

Skul progrem we mipela i go on long tisim tok Inglis na tu givim ol liklik saplai olsem skul bek long ol skul pikinini insait long wan wan skul na dispela rot i op long autim nem bilong Jisas long ol.

Helt Progrem

Mi save helpim long ogenaisim ron bilong ol Kristen medikel dokta na nes na dentist long kantri Singapore long kam na ronim mobail klinik long distrik Likisa. Ol dispela lain i save kam na helpim sik long bodi na long spirit tu.

Wok namel long ol meri, susa Mangan i go on long helpim ol tarangu meri long wokim kalenda na kad long sapotim ol yet. Susa i save tokaut long laikim na sori bilong God long ol dispela meri. Wantaim ol dispela projek na ol arapela projek tu long helpim long bodi sait, mipela i lukim ol Timor lain i redi long harim gutnius.

Baibel Skul long ples Loes

Tenkyu long prea, brata Daniel Gutmann i bringim ol Swiss volentia

tim i go kamap long Is Timor na ol i helpim long sanapim haus long ples Loes we Baibel Skul bai i kamap. Susa Mangan i save kukim kaikai



bilang ol tim taim brata Mike i save raun na bungim ol material samting bilong sanapim haus. Swiss volentia tim i helpim pinis wok na ol i go bek long Switzerland.

Tupela kamda brata long PNG, Eninton na Matyu i wok yet long aplai long paspot, wanem taim i redi bai tupela i lusim PNG na go long Is Timor.



God i opim rot na ol i skruim nupela EBC sios long Is Timor long ples Borai. God i ken blesim yupela long prea na sapot long dispela wok.

INLAN MISIN RIPOT

Yumi ken go on long tingim ol long prea na sapot long olgeta inlan wok misin bilong yumi insait long PNG yet.

Boda bilong Wes Papua na PNG

I no long taim brata Kennedy wantaim tim i bin i go long boda stret bilong Indonesia na PNG long wanpela visit na autris. God i helpim na ol i bungim planti ol Wes Papua na autim gutnius long ol. Yumi ken prea

long dispela wok misin bai God i opim dua long ol wok manmeri i ken bringim gutnius long ol.

Wok misin long Tari, Enga/Sepik boda, Kaintiba, Gabadi, ples Wabo long Kerema, Samarai na Manus na ol arapela ples. Prea inap God i ken givim amamas na strong long ol wok manmeri long mekim wok.

SAMPELA PREA POIN LONG TINGIM NA PREA:

- Tenkyu long God i opim dua bilong wok misin.
- Tenkyu long helpim bilong God long famili Sifu na wok misin bilong ol.
- Tenkyu, God i helpim ol Swiss tim i go kirapim nupela Baibel Skul long Timor.
- Tenkyu long nupela kongrigesen i kamap long Timor.
- Tenkyu long gutnius i go long sampela nupela ples.

ASKIM POIN

- Prea God i ken givim strong na amamas long famili.
- Prea God i ken yusim ol namel long tupela sios na Baibel Skul.
- Prea long God i ken helpim na wok long nupela Baibel Skul long Timor i ken go gut.
- Prea long God i ken givim moa strong na amamas long Mike na Mangan.
- Prea long nupela kongrigesen long EBC Timor i ken kisim strong long spirit.
- Prea long paspot aplikesen bilong tupela brata Eninton na Matyu i ken go gut na tupela bai go long Is Timor.
- Prea long olgeta wokmanmeri insait long PNG inlan misin fil.
- Yumi ken prea inap God i ken kirapim wanpela famili long go long Is Timor.

Mipela i laik tok bikpela tenkyu long Papa long kirapim yupela wan wan long tingim inlan na ovasis misin na yupela i save prea na sapot gut, mipela tu prea olsem God yet bai blesim na strongim bilip bilong yupela wan wan.



Br. Daniel Gutmann wantaim tim bilong en, long Timor